

# KARTA KU PAULU SKIRBI PA TITU

## Introduson

Suma Timótiu, Titu seduba un “fiju na fe” ku ta tarbajaba ku Paulu, ma si nomi ka sta na libru di Atus, son na 2 Kor 2.13; 7.6,13-14; 8.6,16-17,23; 12.18; Gal 2.1-3 ku 2 Tim 4.10. Paulu fikal na Kreta, un jiu garandi na Mar Mediteraneu, pa i toma konta di igreža la, i kuji presbiterus na kada tabanka. Ne karta “pastoral”, Paulu splikal kal koldadi omis ku pudi kujidu. I dal manga di konsiju ku regras pa pasanta pa krentis di Kreta.

## Kumsada ku manteña

**1** <sup>1</sup>E karta i di mi, Paulu, servu di Deus, apostolu di Jesus Kristu, ku mandadu pa juda na fe di kilis ku Deus kuji, pa leba elis pa kungsi bardadi konformi no fe, <sup>2</sup>na speranza di vida ku ka ta kaba. Deus, ku ka ta konta mintida, falaba ja antis di kumsada di tempu, kuma i na danu e vida. <sup>3</sup>Na tempu propi i mostra si palabra; i ntregan el pa N konta, konformi ordi di Deus no Salbadur.

<sup>4</sup>N na skirbi pa bo, Titu, ku sedu na bardadi ña fiju na fe ku no juntadu nel. N misti pa Deus no Pape ku Kristu Jesus no Salbadur dau fabur ku pas.

## Vida di un diriženti di igreža

(1 Tim 3.1-13)

<sup>5</sup>N fikau na Kreta pa bu pudi pui na ordi kusas ku falta inda, pa bu kuji presbiterus na kada tabanka. Suma ku N mandau, <sup>6</sup>i ten ku sedu algin sin kulpa, omi di un minjer son, ku tene fijus krenti ku ka ta faladu kuma e ten falta di ordi, o e ka ta obi, <sup>7</sup>pabia presbiteru ku sedu nkargadu di kasa di Deus i dibi

di sedu sin kulpa; i ka dibi di sedu kunfiadu, nin algin ku ta lestu di paña raiba, nin ku ta bibi ciu, nin sutadur, nin ku ta faima pa diñeru. <sup>8</sup>I dibi di sedu gasijadur, amigu di kil ki bon, ku sibi gubernana si kabesa, justu, puru, ku ten ordi na si vida. <sup>9</sup>I ten ku pega na palabra ser-tu di nsinamentu, pa i pudi ten puder pa konsija ku nsinamentu di bardadi, suma tambi pa mostra eru di kilis ku sta kontra el.

<sup>10</sup>I ten manga delis, rebeldis, ku ta papia palabras amonton pa ngana jinti; purmeru delis i judeus. <sup>11</sup>I pirsis tapa elis boka, pabia e ta jagasi sintidu di familias ntidu, ku nsina kusas ke ka dibi di nsina, son ku fin borgoñosu pa ngaña diñeru. <sup>12</sup>Un omi di Kreta ku sedu se diviñadur propi i fala: “Jinti di Kreta sempri i munturus, brutus mau, wuku prigosu.”

<sup>13</sup>E tustumuñu i bardadi. Pabia des, raprindi elis ku forsa, pa e

1.1: Rom 1.1 1.2: Num 23.19; Rom 16.25

1.3: At 9.15 1.4: 1 Tim 1.1; 2 Tim 1.2 1.4: Rom 1.7

1.5: At 14.23 1.7: 1 Kor 4.1-2 1.9: 2 Tes 2.15;

2 Tim 1.13; 2.2 1.11: 1 Tim 6.5 1.12: At 17.28

1.13: Kap 2.15; 1 Kor 4.21

pudi kungsi bardadi, e fia nel. <sup>14</sup>Ka e fia na storias di judeus, nin mandamentus di jinti ku nega bardadi. <sup>15</sup>Tudu i puru pa jinti puru, ma nada i ka puru pa kilis ki susu, kilis ku ka ten fe, ma se ntindimentu ku se konsiensia sta susu. <sup>16</sup>E fala kuma e kungsi Deus, ma e ta negal ku kugas ke ta fasi. E sedu disobdienti, susu dianti di Deus; e ka dignu di fasi nin un bon tarbaju.

### Bon konsiju pa tudu jinti

**2** <sup>1</sup>Abo, bu dibi di fala kil ki diritu konformi bon nsinamentu. <sup>2</sup>Konsija omis beju pa e sedu seriu, ku bon juisu, ku pudi gubernase kabesa, ku kungsi bardadi, e fia nel, ku ten amor, ku firmesa. <sup>3</sup>Minjeris beju tambi, konsija elis pa e yanda ku rispitu pa Deus, pa ka e konta mintida pa utru, nin pa ka e bibi biñu ciu, pa e nsina kil ki bon, <sup>4</sup>pa e trena minjeris nobu ama se omis ku se fijus, pa e sibi gubernase kabesa, <sup>5</sup>pa e sedu puru, e sedu bon, pa e sibi gubernase kasa diritu, e rispita se omis, pa ka da motivu pa jinti fala mal di palabra di Deus.

<sup>6</sup>Konsija rapasis nobu tambi pa e sedu brandu na tudu. <sup>7</sup>Abo propi, bu ten ku sedu isemplu na tudu, ku bon tarbaju ku bu na fasi. Na bu

**1.14:** 2 Tim 4.4 **1.15:** Luk 11.39-41; Rom 14.14,20,23  
**1.16:** Ez 33.31; 2 Tim 3.5 **2.6:** 1 Ped 5.5 **2.7:** 1 Tim 4.12  
**2.8:** Mar 12.28,32,34; Kol 4.6 **2.8:** Ne 5.9  
**2.9:** Ef 6.5 **2.10:** Mat 5.16; Fil 2.15 **2.11:** Luk 3.6;  
 Jon 1.9; Rom 5.15 **2.12:** Luk 1.75; Rom 6.19  
**2.13:** 1 Kor 1.7 **2.14:** Mat 20.28 **2.14:** Sai 19.5-6  
**2.15:** 1 Tim 4.12; 5.20 **3.1:** Rom 13.1 **3.1:** Kol 1.10  
**3.2:** Ef 4.31; Tia 3.9-10; 4.11 **3.2:** Mat 11.29;  
 2 Tim 2.24-25 **3.3:** 1 Kor 6.10-11; Kol 1.21

nsinamentu bu ten ku sedu seriu, sinseru; <sup>8</sup>bu ten ku ten bon palabra ku ningin ka pudi kulpau nel, pa kilis ku sta kontra e ta burguñu, pabia e ka ten nin un mal di fala kontra nos.

<sup>9</sup>Konsija katibus pa e obdisi se dunus na tudu, pa e pui elis kontenti. Ka e ba ta ruspundi mal; <sup>10</sup>ka e ba ta toma kusa ku se dunu ka da elis, ma e ten ku mostra sedu sempri bon i fiel, pa e sedu un bon fajamentu na tudu kusa pa nsinamentu di Deus no Salbadur.

<sup>11</sup>Deus mostra tudu jinti si fabur ku ta salba, <sup>12</sup>pa nsinanu nega vida mau ku tudu disežu di mundu, pa no sibi gubernase kabesa ne mundu di gosi, no sedu retu, no yanda suma ku Deus misti, <sup>13</sup>kontra no na pera ki dia alegri ku no pui no speransa nel, ku gloria di no garanti Deus Salbadur, Jesus Kristu, na parsi. <sup>14</sup>El i da si vida pa libertanu di tudu maldadi, pa fasinu un pobu puru ku pertensil, ku ten vontadi pa fasi bon tarbaju.

<sup>15</sup>Nsina e kugas, bu konsija, bu raprindi elis ku tudu otridadi. Ka bu disa ningin lebsiu.

### Manera di yanda suma krenti

**3** <sup>1</sup>Lembranta elis pa e baša pa gubernu ku otridadi, pa e obdisi elis, pa e sta pruntu pa fasi tudu bon tarbaju, <sup>2</sup>pa ka e fala mal di ningin, ka e buska palabra, ma pa e mostra pasensa, e sedu mansu pa tudu jinti. <sup>3</sup>Purmeru, asin ku no seduba: tulu, disobdienti, eradu, katibus pa tudu koldadi disežu mau, ku gozu di

mundu. No ta yandaba na malisia ku nveža; no odiaduba, no ta odia utru jinti tambi, <sup>4</sup>ma oca ku Deus no Salbadur mostra si bondadi ku si amor pa jinti, <sup>5</sup>i salbanu; i ka pabia di kualker kusa bon ku no fasi, ma i pabia di si miserikordia ki labanu, i danu nobu nasimentu, un vida nobu di Spiritu Santu. <sup>6</sup>I darma si Spiritu ciu riba di nos pabia di Jesus Kristu no Salbadur, <sup>7</sup>pa no pudi ojadu justu dianti di Deus pabia di si fabur, pa no bin tene vida ku ka ta kaba, konformi speransa ku no ten.

<sup>8</sup>Es i palabra ku bu pudi fia nel. Konta e kusas ku firmesa, pa tudu kilis ku fia na Deus pui sintidu pa da se tempu pa fasi bon tarbaju. I ka son kuma i bon, ma i di purbitu pa tudu jinti. <sup>9</sup>Libra di purfias di tulesa, ku ki listas di jinti antigu, ku jus,

ku diskuti kusa di lei, pabia i ka ten purbitu; i suma nada. <sup>10</sup>Algin ku ta tisi rapatimentu, dal avisu te dus bias. Dipus, bu libra del. <sup>11</sup>Bu sibi kuma jinti di ki koldadi e tortu; e ta fasi mal, e na kondena se kabesa.

### Manteña di kabantada

<sup>12</sup>Ora ku N mandau Artemas o Tíkiku, fasi forsa pa bin nunde mi na Nikópolis, pabia la ku N rezolvi pasa cuba nel. <sup>13</sup>Fasi mpeñu pa juda Zenas, pursor di lei, ku Apolu, pa nada ka falta elis na bias. <sup>14</sup>No jinti dibi di buska sibi pui sintidu na bon tarbaju, pa e tene tudu ki pirsis, pa ka e sedu amonton.

<sup>15</sup>Tudu jinti ku sta ku mi e mandau manteña. Fala kilis ku amanu na fe manteña.

Fabur di Deus ta sta ku bos tudu.

---

**3.4:** Kap 2.11   **3.5:** Rom 3.20; Ef 2.8-9   **3.5:** Jon 3.3,5  
**3.7:** Rom 8.23-24   **3.8:** 1 Tim 1.15   **3.8:** Kap 2.14  
**3.9:** 1 Tim 1.4; 2 Tim 2.14,23   **3.10:** Mat 18.17;  
Rom 16.17; 2 Kor 13.2   **3.11:** At 13.46   **3.12:** At 20.4  
**3.13:** At 18.24   **3.14:** Ef 4.28; 2 Ped 1.8  
**3.15:** Rom 16.20